

简体字本

元史

卷六一·卷一二七



中华书局

元史

二

〔明〕宋 濂 等撰

中 华 书 局

元史卷六十一

志第十三

地理四

云南诸路行中书省，为路三十七、府二，属府三，属州五十四，属县四十七。其余甸寨军民等府不在此数。马站七十四处，水站四处。

云南诸路道肃政廉访司。大德三年，罢云南行御史台，立肃政廉访司。

中庆路，上。唐姚州。阁罗凤叛，取姚州，其子凤伽异增筑城曰柘东，六世孙券丰祐改曰善阐，历五代迄宋，羁縻而已。元世祖征大理，凡收府八，善阐其一也，郡四，部三十有七。其地东至普安路之横山，西至缅甸之江头城。凡三千九百里而远；南至临安路之鹿沧江，北至罗罗斯之大渡河，凡四千里而近。宪宗五年，立万户府十有九，分善阐为万户府四。至元七年，改为路。八年，分大理国三十七部为南北中三路，路设达鲁花赤并总管。十三年，立云南行中书省，初置郡县，遂改善阐为中庆路。领司一、县三、州四。州领八县。本路军民屯田二万二千四百双有奇。

录事司。

县三

昆明，中。倚郭。唐置。元宪宗四年，分其地立千户二。至元十二年，改善州，领县。二十一年，州革，县如故。其地有昆明池，五百馀里，夏潦必冒城郭。张立道为大理等处劝农使，求泉源所出，泄其水，得地万馀顷，皆为良田云。富民，下。至元四年，立黎溪千户。十二年，即黎溪立县。宜良，下。唐匡州，即其地。蛮酋罗氏于此立城居之，名曰罗哀龙，乃今县也。元宪宗六年，立太池千户，隶嵩明万户。至元十三年，升宜良州，治太池县。

二十一年，州罢为县，后废太池来属。

州四

嵩明州，下。州在中庆东北，治沙札卧城。乌蛮车氏所筑，白蛮名为嵩明。昔汉人居之，后乌、白蛮强盛，汉人徙去，盟誓于此，因号嵩盟，今州南有土台，盟会处也。汉人尝立长州，筑金城、阿葛二城。蒙氏兴，改长州为嵩盟部，段氏因之。元宪宗六年，立嵩明万户。至元十二年，复改长州。十五年，升嵩明府。二十二年，降为州。领二县：

杨林，下。在州东南，治杨林城，乃杂蛮枳氏、车氏、斗氏、麽氏四种所居之地，城东门内有石如羊形，〔1〕故又作羊。唐有羊林部落，即此地。元宪宗七年，立羊林千户。至元十二年，改为县。邵甸，下。在州西，治白邑村，无城郭，车蛮、斗蛮旧地，名为束甸，以束为邵，宪宗七年，立邵甸千户。至元十二年，改为县。

晋宁〔州〕，〔2〕下。唐晋宁县，蒙氏、段氏皆为阳城堡部。元宪宗七年，立阳城堡万户。至元十二年，改晋宁州。领二县：

呈贡，下。西临滇泽之滨，在路之南，州之北，其间相去六十里，有故城曰呈贡，世为些莫强宗部蛮所居。元宪宗六年，立呈贡千户。至元十二年，割迺营、切龙、呈贡、雌甸、塔罗、和罗忽六城及乌纳山立呈贡县。归化，下。在州东北，呈贡县南，西滨滇泽，地名大吴龙，〔背〕〔昔〕吴氏所居，〔3〕后为些莫徒蛮所有，世隶善阐。宪宗六年，分隶呈贡千户。至元十二年，割大吴龙、安江、安溯立归化县。

昆阳州，下。在滇池南，爨、獠杂夷所居，有城曰巨桥，今为州治。閼罗凤叛唐，令曲畴蛮居之。段氏兴，隶善阐。元宪宗并罗昌等十二城，立巨桥万户。至元十二年，改昆阳州。领二县：

三泊，下。至元十三年，于那龙城立县。易门，下。在州之西，治市坪村，世为乌蛮所居。段氏时，高智昇治善阐，奄而有之。至元四年，立澳门千户。十二年，改为县。县西有泉曰澳源。讹作易门。

安宁州，下。唐初置安宁县，隶昆州。閼罗凤叛唐后，乌、白蛮迁居。蒙氏终，善阐酋孙氏为安宁城主，及袁氏、高氏互有其地。元宪宗七年，隶阳城〔堡〕万户。〔4〕至元三年，立安宁千户。十二年，改安宁州。领二县：

禄丰，下。在州西，治白村，其地瘴热，非大酋所居，惟乌、杂蛮居之，〔5〕迁徙不常。

至元十二年，割安宁千户之碌琫、化泥、骧琫三处立禄丰县。因江中有石如甑，俗名碌琫，译谓碌为石，琫为甑，讹为今名。罗次。下。在州北，治压磨吕白村，本乌蛮罗部，地险俗悍。至元十二年，因罗部立罗次州，隶中庆路。二十四年，改州为县。二十七年，隶安宁州。

威楚开南等路，下。为杂蛮耕牧之地，夷名俄碌，历代无郡邑，后爨酋威楚筑城俄碌居之。唐时蒙舍诏阁罗凤合六诏为一，侵俄碌，取和子城，今镇南州是也。后阁罗凤叛，于本境立郡县，诸爨尽附。蒙氏立二都督、六节度，银生节度即今路也。及段氏兴，银生隶姚州，又名当筋验。^{〔6〕}及高昇泰执大理国柄，封其侄子明量于威楚，筑外城，号德江城，传至其裔长寿。元宪宗三年征大理，平之。六年，立威楚万户。至元八年，改威楚路，置总管府。领县二、州四。州领一县。本路军民屯田共七千一百双。

县二

威楚，下。倚郭。至元十五年，升威州，仍立富民、净乐二县。二十一年，降州为威楚县，革二县为乡来属。定远。下。在路北，地名目直眼，杂蛮居之。诸葛孔明征南中，经此眼，后号为牟州。唐蒙氏遣爨酋抬尊镇牟州，筑城曰耐笼。至高氏专大理国政，命云南些莫徒酋夷徙民二百户于黄蓬穿，其抬尊故城隶高氏。元宪宗四年，立牟州千户，黄蓬穿为百户。至元十二年，改为定远州，黄蓬穿为南宁县，后革县为乡，改州为县，隶本路。

州四

镇南州，下。州在路北，昔朴、落蛮所居。川名欠舍，中有城曰鸡和。至唐时，蒙氏并六诏，征东蛮，取和子、鸡和二城，置石鼓县，又于沙却置俗富郡。沙却即今州治。至段氏封高明量为楚公，欠舍、沙却皆隶之。元宪宗三年，其酋内附。七年，立欠舍千户、石鼓百户。至元二十二年，改欠舍千户为镇南州，立定边、石鼓二县。二十四年，革二县为乡，仍隶本州。

南安州，下。州在路东南，山岭稠叠，内一峰竦秀，林麓四周，其顶有泉。昔黑爨祖瓦晟立栅居其上，子孙渐盛，不隶他部，至高氏封威楚方隶焉。宪宗立摩刍千户，隶威楚万户。至元十二年，改千户为南安州，隶本路。领一县：

广通。下。县在州之北，夷名为路跋，杂蛮居之。南诏阁罗凤曾立路跋县，至段氏封高明量于威楚，其后宜州酋些莫徒裔易哀等附之，至高长寿遂处于路跋，易哀去旧堡二十里，山上筑城白龙戏新栅。宪宗七年，长寿内附，立路跋千户。至元十二年改为广通县，隶南安州。

开南州，下。州在路西南，其川分十二甸，昔朴、和泥二蛮所居也。庄蹻王滇池，汉武开西南夷，葛孔明定益州，皆未尝涉其境。至蒙氏兴，立银生府，后为金齿、白蛮所陷，移府治于威楚，开南遂为生蛮所据。自南诏至段氏，皆为徼外荒僻之地。元中统三年平之，以所部隶威楚万户。至元十二年，改为开南州。

威远州，下。州在开南州西南，其川有六，昔朴、和泥二蛮所居。至蒙氏兴，开威楚为郡，而州境始通。其后金齿、白夷蛮酋阿只步等夺其地。中统三年征之，悉降。至元十二年，立开南州及威远州，隶威楚路。

武定路军民府，下。唐隶姚州，在滇北，昔獐鹿等蛮居之。至段氏使乌蛮阿剌治纳滇脍共龙城于共甸，又筑城名曰易龙，其裔孙法瓦浸盛，以其远祖罗婺为部名。元宪宗四年内附。七年，立为万户，隶威楚。至元八年，并仁德、于矢入本部为北路。十一年，割出二部，改本路为武定。领州二。州领四县。本路屯田七百四十八双。

州二

和曲州，下。州在路西南，蛮名叵箴甸，梵、獐诸种蛮所居。地多汉冢，或谓汉人曾居。蒙氏时，白蛮据其地，至段氏以乌蛮阿剌并吞诸蛮聚落三十馀处，分兄弟子侄治之，皆隶罗婺部。元宪宗六年，改叵箴甸曰和曲。至元二十六年，升为州。领二县：

南甸，下。路治本县，蛮曰濮甸，又称濮甸箴。元二十六年改为县。元谋。下。夷中旧名环州，元治五甸，至元十六年改为县。

禄劝州，下。州在路东北，甸名洪农碌券，杂蛮居之，无郡所。至元二十六年，立禄劝州。领二县：

易箴，下。易箴者，城名，在州北，地名倍场。县境有二水，蛮语谓濮为水，箴为城，因

此为名。昔罗婺部大酋居之，为群酋会集之所。至元二十六年，立县。石旧。下。县在州东，有四甸：曰掌鸠，曰法块，曰抹捺，曰曲蔽。掌鸠甸有溪绕其三面，凡数十渡，故名，今讹名石旧。至元二十六年，立县。

鹤庆路军民府，下。府治在丽江路东南，大理路东北，夷名其地曰鹤川、样共。昔隶越析诏，汉、唐未建城邑。开元末，阁罗凤合六诏为一，称南诏，徙治羊苴〔咩〕城，〔7〕地近龙尾、鹤柘，今府即其地也。大和中，蒙劝封祐于样共立谋统郡。蒙氏后，经数姓如故。元宪宗三年内附，为鹤州。七年，立二千户，仍称谋统，隶大理上万户。至元十一年，罢谋统千户，复为鹤州。二十年，为燕王分地，隶行省。二十三年，升为鹤庆府。领一县：

剑川。下。县治在剑川湖西，夷云罗鲁城。按唐史南诏有六节度，剑川其一也。初蒙氏未合六诏时，有浪穹诏与南诏战，不胜，遂保剑川，更称〔浪剑〕〔剑浪〕。〔8〕贞元中，南诏击破之，夺剑、共诸川地，其酋徙居剑峡西北四百里，号剑羌。蒙氏终，至段氏，改剑川为义督险。宪宗四年内附。七年，立义督千户。至元十一年，罢千户，立剑川县，隶鹤州。军民屯田共一千餘双。

云远路军民总管府，元贞二年置。

彻里军民总管府，大德中置。大德中，云南省言：“大彻里地与八百媳妇犬牙相错，势均力敌。今大彻里胡念已降，小彻里复控扼地利，多相杀掠，胡念日与相拒，不得离，遣其弟胡伦入朝，指画地形，乞别立彻里军民宣抚司，择通习蛮夷情状者为之帅，招其来附，以为进取之地。”乃立彻里军民总管府。

广南西路宣抚司。阙。

丽江路军民宣抚司，路因江为名，谓金沙江出沙金，故云。源出吐蕃界。今丽江即古丽水，两汉至隋、唐皆为越雋郡西徼地，昔麽蛮、些蛮居之，遂为越析诏。二部皆乌蛮种，居铁桥。贞元中，其地归南诏。元宪宗三年，征大理，从金沙济江，麽、些负固不服。四年春，平之，立茶罕章管民官。至元八年，立宣慰司。十三年，改为丽江路，立军民总管府。二十二年，府罢，于通安、巨津之间立宣抚司。领府一、州七。州领一县。

府一

北胜府，在丽江之东。唐南诏时，铁桥西北有施蛮者，贞元中为异牟

寻所破,迁其种居之,号剑羌,名其地曰成偈睢,又改名善巨郡。蒙氏终,段氏时,高智昇使其孙高大惠镇此郡。后隶大理。元宪宗三年,其酋高俊内附。至元十五年,立为施州。十七年,改为北胜州。二十年,升为府。^{〔9〕}

州七

顺州,在丽江之东,俗名牛睢。昔顺蛮种居剑、川共^{〔共川〕}。^{〔10〕}唐贞元间,南诏异牟寻破之,徙居铁桥、大婆、小婆、三探览等川。其酋成斗族渐盛,自为一部,迁于牛睢。至十三世孙自瞠犹隶大理。元宪宗三年内附。至元十五年,改牛睢为顺州。

蒺藜州,治罗共睢,在丽江之东,北胜、永宁南北之间,罗落、麽、些三种蛮世居之。宪宗三年,征大理。至元九年内附。十六年,改罗共睢为蒺藜州。

永宁州,昔名楼头睢,接吐蕃东徼,地名答蓝,麽、些蛮祖泥月乌逐出吐蕃,遂居此睢,世属大理。宪宗三年,其三十一世孙和字内附。至元十六年,改为州。

通安州,治在丽江之东,雪山之下。昔名三睢。仆緦蛮所居,其后麽、些蛮叶古乍夺而有之,世隶大理。宪宗三年,其二十三世孙麦良内附。中统四年,以麦良为察罕章管民官。至元九年,其子麦兀袭父职。十四年,改三睢为通安州。

兰州,在兰沧水之东。汉永平中始通博南山道,渡兰沧水,置博南县。唐为卢鹿蛮部。至段氏时,置兰溪郡,^{〔11〕}隶大理。元宪宗四年内附,隶茶罕章管民官。至元十二年,改兰州。

宝山州,在雪山之东,丽江西来,环带三面。昔麽、些蛮居之。其先自楼头徙居此,二十馀世。世祖征大理,自卞头济江,由罗邦至罗寺,围大匭等寨,其酋内附,名其寨曰察罕忽鲁罕。至元十四年,以大匭七处立宝山县,十六年升为州。

巨津州,昔名罗波九睢,北接三川、铁桥,西邻吐蕃。按唐书,南诏居铁桥之南,西北与吐蕃接。今州境实大理西北阨要害地,麽、些大酋

世居之。宪宗三年内附。至元十四年，于九睺立巨津州，盖以铁桥自昔为南诏、吐蕃交会之大津渡，故名。领一县：

临西。下。县在州之西北，乃大理极边险僻之地，夷名罗哀间，居民皆麽、些二种蛮。

至元十四年，立大理州县，于罗哀间立临西县，以西临吐蕃境故也，隶巨津州。

东川路，下。至元二十八年立。

茫部路军民总管府。下。

益良州。下。

强州。下。

孟杰路。自东川路以下阙，泰定三年，八百媳妇蛮请官守，置木安、孟杰二府于其地。

普安路，下。治在盘町山阳，巴盘江东。古夜郎地。秦为黔中地，两汉隶牂柯郡，蜀隶兴古郡，隋立牂州。唐置西平州，后改兴古郡为盘州。蒙氏叛唐，其地为南诏东鄙，东爨乌蛮七部落居之。其后爨酋阿宋逐诸蛮据其地，号于失部，世为首长。元宪宗七年，其酋内附，命为于失万户。至元十三年，改普安路总管府。明年，更立招讨司。十六年，改为宣抚司。二十二年，罢司为路。

曲靖等路宣慰司军民万户府，^{〔12〕}曲、靖二州在汉为夜郎味县地。蜀分置兴古郡。隋初为恭州、协州。唐置南宁州。东、西爨分乌、白蛮二种，自曲靖州西南昆川距龙和城，通谓之西爨白蛮。自弥鹿、升麻二川南至步头，通谓之东爨乌蛮。贞观中，以西爨归王为南宁都督，袭杀东爨首领盖聘。南诏阁罗凤以兵胁西爨，徙之至龙和，皆残于兵。东爨乌蛮复振，徙居西爨故地，世与南诏为婚，居故曲靖州。天宝末，征南诏，进次曲靖州，大败，其地遂没于蛮。元宪宗六年，立磨弥部万户。至元八年，改为中路。十三年，改曲靖路总管府。二十年，以隶皇太子。二十五年，升宣抚司。领县一、州五。州领六县。本路屯田四千四百八十双，岁输金三千五百五十两、马一百八十四。

县一

南宁。下。倚郭。唐以爨归王为南宁州都督，治石城。及阁罗凤叛，州废，蒙氏改石城郡。至段氏，乌蛮莫弥部首据石城。元宪宗三年内附。六年，立千户，隶莫弥部万户。至

元十三年，升南宁州。二十一年，革为县。

州五

陆凉州，下。即汉牂柯郡之平夷县。南诏叛后，落温部蛮世居之。宪宗三年内附，立落温千户，属落蒙万户。至元十三年，改为陆凉州。领二县：

芳华，下。在州西。河纳，下，在州南，治蔡村。

越州，下。在路之南，其川名鲁望，普麽部蛮世居之。宪宗四年内附。六年，立千户，隶末迷万户。至元十二年，改越州，隶曲靖路。

罗雄州，下。与溪洞蛮獠接壤，历代未尝置郡，夷名其地为塔敝纳夷甸。俗传盘瓠六男，其一曰蒙由丘，后裔有罗雄者居此甸。至其孙普恐，名其部曰罗雄。宪宗四年内附。七年，隶普摩千户。至元十三年，割夜苴部为罗雄州，隶曲靖路。

马龙州，下。夷名曰撒匡。昔爨、刺居之，盘瓠裔纳垢逐旧蛮而有其地。至罗苴内附，于本部立千户。至元十三年，改为州，即旧马龙城也。领一县：

通泉，下。在州西南，与嵩明州杨林县接壤，纳垢之孙易暹分居其地。元初为易龙百户，隶马龙千户。至元十三年，改名通泉县，隶马龙州。

霭益州，下。在本路之东北，据南盘江、北盘江之间。唐初置州，天宝末，没于蛮，为爨、刺二种所居。后磨弥部夺之。元初其孙普垢剽内附。宪宗七年，以本部隶曲靖磨弥万户府。至元十三年，改霭益州。领三县：

交水，下。治易戛龙城。其先磨弥部酋蒙提居之，后大理国高护军逐其子孙为私邑。

宪宗五年内附。至元十三年，即其城立县。石梁，下。系磨弥部，又名伍勒部。其酋世为巫，居石梁原山。至元十三年为县。罗山，下。夷名落蒙山，乃磨弥部东境。

澂江路，下。治在滇池东南。唐属牂州，隶黔州都督府。开元中，降为羁縻州。今夷中名其地曰罗伽甸。初，麽、些蛮居之，后为爨蛮所夺。南诏蒙氏为河阳郡，至段氏，麽、些蛮之裔复居此甸，号罗伽部。元宪宗四年内附，六年以罗伽部为万户。至元三年，改万户为中路。十六年，

升为潞江路。领县三、州二。州领三县。本路屯田四千一百双。

县三

河阳，下。内附后为千户。至元十六年，为河阳州。二十六年，降为县。江川，下。在潞江路南，星云湖之北。蒙氏叛唐，使白蛮居之。至段氏，些麽徙蛮之裔居此城。更名步雄部。其后弄景内附，即本部为千户。至元十三年，改千户为江川州。二十年，降为县。

阳宗，下。在本路西北，明湖之南。昔麽、些蛮居之，号曰强宗部，其酋庐舍内附，立本部千户。至元十三年，改为县。

州二

新兴州，下。汉新兴县。唐初隶牂州，后南诏叛，降为羁縻州。蒙氏为温富州。段氏时麽、些蛮分居其地。内附后，立为千户。至元十三年，改新兴州，隶潞江路。领二县：

普舍，下。在州西北。昔有强宗部蛮之裔，长曰部傍，据普县、龙城，次曰普舍，据普札、龙城。二城之西有白城，汉人所筑。二酋屡争其地，莫能定。后普舍孙苴内附，立本部为千户。十三年，改千户为普舍县，治普札、龙城，隶新兴州。研和，下。麽、些蛮徙步雄居之，〔13〕其孙龙铺内附，立百户。至元十三年，改为县。

路南州，下。州在本路之东，夷名路甸，有城曰撒吕，黑爨蛮之裔落蒙所筑，子孙世居之，因名落蒙部。宪宗朝内附，即本部立万户。至元七年，并落蒙、罗伽、末迷三万户为中路。十三年，分中路为二路，改罗伽为潞江路，落蒙为路南州，隶潞江路。领一县：

邑市，下。至元十三年，即邑市、弥歪二城立邑市县，弥沙等五城立弥沙县。二十四年，并弥沙入本县，隶路南州。

普定路，本普里部，归附后改普定府。至元二十七年，初斡罗思、吕国瑞人贿丞相桑哥及要束木等，请创罗甸宣慰司。至是，言招到罗甸、国札哇并龙家、宋家、斡猪、苗人诸种蛮夷四万六千六百户。阿卜、阿牙者来朝，为曲靖路宣慰司同知脱因及普安路官所阻。会云南行省言：“罗甸即普里也，归附后改普定府，印信具存，隶云南省三十餘年，赋役如期。今所创罗甸宣慰司安抚司，隶湖南省。斡罗思等擅以兵胁降普定土官矣资男、札哇、希古等，勒令同其入觐，邀功希赏，乞罢之，仍以其地隶云南。”制可。大德七年，改为路。大德七年，中书省臣言：“蛇节、宋隆济等作乱，普定知府容直率众效顺。容直没，其妻適姑亦能宣力戎行，乞令袭其夫职。仍改普定为路，隶曲靖宣慰司，以適姑为本路总管，虎符。”

仁德府，昔楚、刺蛮居之，无郡县。其部曰仲扎、溢源，后乌蛮之裔新丁夺

而有之。至四世孙，因其祖名新丁，以为部号，语讹为仁地。宪宗五年内附。明年，立本部为仁地万户。至元初复叛，四年降之，仍为万户。十三年，改万户为仁德府。本府屯田五百六十双。领县二：

为美，下。县治在府北，地名溢浦適伯賸甸，即仁地故部。至元二十四年置县。归厚。

下。县治在府西，地名易浪蒲龙，旧隶仁地部。至元二十四年，分立二县，曰倘俸，曰为美。

二十五年，改倘俸曰归厚。

罗罗蒙庆等处宣慰司都元帅府。^[14]

建昌路，下。本古越雋地，唐初设中都〔督〕府，治越雋。^[15]至德中，没于吐蕃。贞元中复之。懿宗时，蒙诏立城曰建昌府，以乌、白二蛮实之。其后诸酋争强，不能相下，分地为四，推段兴为长。其裔浸强，遂并诸酋，自为府主，大理不能制。传至阿宗，娶落兰部建蒂女沙智。元宪宗朝，建蒂内附，以其婿阿宗守建昌。至元十二年，析其地置总管府五、州二十三，建昌其一路也，设罗罗宣慰司以总之。本路领县一、州九。州领一县。本路立军民屯田。

县一

中县。县治在住头回甸，盖越雋之东境也。所居乌蛮自别为沙麻部，以酋长所立处为中州。至元十年内附。十四年，仍为中州。二十二年，降为县。隶建昌路。

州九

建安州，下。即总府所治。建蒂既平，分建昌府为万户二，又置千户二。至元十五年，割建乡城十四村及建蒂四村立宝安州。十七年，改本千户为建安州。二十六年，革宝安州，以其乡村来属。

永宁州，下。在建昌之东郭。唐时南诏立建昌郡，领建安、永宁二州。元至元九年，西平王平建蒂。十六年，分建昌为二州，在城曰建安，东郭曰永宁，俱隶建昌路。

泸州，下。州在路西，昔名沙城险，即诸葛武侯禽孟获之地。有泸水，深广而多瘴，鲜有行者，冬夏常热，其源可焗鸡豚。至段氏时，于热水甸立城。名洩笼，隶建昌。宪宗时，建蒂内附，复叛，至元九年平之。十五年，改洩笼为泸州。

礼州，下。州在路西北，泸沽水东，所治曰笼麽城。南诏末，诸蛮相侵夺，至段氏兴，并有其地。裔孙阿宗内附，复叛，至元九年平之，设千户。十五年，改为礼州。领一县：

泸沽。县在州北。昔罗落蛮所居，至蒙氏霸诸部，以乌蛮酋守此城，后渐盛，自号曰落兰部，或称罗落。其裔蒲德遣其侄建蒂内附。建蒂继叛，杀蒲德，自为酋长，并有诸部。

至元九年平之，设千户。十三年升万户，十五年改县。

里州，下。唐隶嵩州都督。蒙诏时落兰部小酋阿都之裔居此，因名阿都部。传至纳空，随建蒂内附。中统三年叛。至元十年，其子耶吻效顺，隶乌蒙。十八年，设千户。二十二年，同乌蛮叛，奔罗罗斯。二十三年，升军民总管府。二十六年，府罢为州，隶建昌路。

阔州，下。州治蛮纳甸。古无城邑，乌蒙所居。昔仲由蒙之裔孙名科居此，因以名为部号，后讹为阔。至三十七世孙燹罗内附。至元九年，设千户。二十六年，改为州。

邛部州，下。州在路东北，大渡河之南，越嵩之东北。君长十数，笮都最大。唐立邛部县，后没于蛮。至宋岁贡名马土物，封其酋为邛都王。今其地夷称为邛部川，治乌弄城，昔麽、些蛮居之，后仲由蒙之裔夺其地。元宪宗时内附。中统五年，立邛部川安抚招讨使，隶成都元帅府。至元十年，割属罗罗斯宣慰司。二十一年，改为州。

隆州，下。州在路之西南，与汉邛(部)[都]县接境，^[16]唐会川县之西北。蒙氏改会川为会同，立五睑，本州为边府睑。其后睑主杨大兰于睑北塼上立城，分派而居，名曰大隆城，即今州治也。元至元十三年内附。十四年，设千户。十七年，改隆州。

姜州，下。姜者蛮名也。乌蛮仲牟由之裔阿坛绛始居阆畔部，其孙阿罗仕大理国主高泰，是时会川有城曰龙纳，罗落蛮世居焉。阿罗挟高氏之势，攻拔之，遂以祖名曰绛部。宪宗时，随阆畔内附，因隶焉。至元八年，为落兰部酋建蒂所破。九年平之，遂隶会川，后属建昌。十五年，改为姜州。二十七年，复属阆畔部，后又属建昌。

德昌路军民府，下。汉邛都县地，唐没于南诏。路在建昌西南，所居蛮

号屈部。元至元九年内附。十二年，立定昌路，以本部为昌州。二十三年，罢定昌路，并入德昌路，治本州葛鲁城。领州四。本路立军民屯田。

昌州，下。路治本州。初，乌蛮阿屈之裔浸强，用祖名为屈部。其孙乌则，至元九年内附。十二年，改本部为州，兼领普济、威龙，隶定昌路。二十三年，罢定昌路，并隶德昌。

德州，下。在路之北。其地今名吾越甸，城曰亦苴龙，所居蛮苴郎，以远祖名部曰赫纒。宪宗时内附。至元十二年，立千户。十三年，改为德州，隶德平路。二十三年，改隶德昌。

威龙州，下。州在路西南，夷名巴翠部，领小部三，一曰沙娲普宗，二曰乌鸡泥祖，三曰娲诺龙菖蒲，皆獠鲁蛮种也。至元十五年，合三部立威龙州，隶德昌。

普济州，下。州在路西北，夷名牙甸。昔为荒僻之地，獠鲁蛮世居之，后属屈部。至元九年，随屈部内附。十五年，于牙甸立定昌路。二十三年，路革，改隶德昌。

会川路，下。路在建昌南。唐移邛都于此。其地当征蛮之要冲，诸酋听会之所，故名。天宝末，没于南诏，立会川都督府，又号清宁郡。至段氏仍为会川府。元至元九年内附。十四年立会川路，治武安州。领州五。本路立军民屯田。

武安州，下。蛮称龙泥城。至元十四年，立管民千户。十七年，改为武安州。

黎溪州，下。古无城邑，蛮云黎驱，讹为今名。初，乌蛮与汉人杂处，及南诏阁罗凤叛，徙白蛮守之。蒙氏终，罗罗逐去白蛮。段氏兴，令罗罗蛮乞夷据其地。至元九年，其裔阿夷内附，改其部为黎溪州。

永昌州，下。州在路北，治故归依城，即古会川也。唐天宝末，没于南诏，置会川都督。至蒙氏改会同府，置五睑，徙张、王、李、赵、杨、周、高、段、何、苏、龚、尹十二姓于此，以赵氏为府主，居今州城。赵氏弱，王氏据之。及段氏（与）〔兴〕，高氏专政，^{〔17〕}逐王氏，以其子高政治会川。元宪宗三年，征大理，高氏逃去。九年，故酋王氏孙阿龙率众内

附。至元八年，以其男阿禾领会川。十四年，改管民千户。十七年，立永昌州，隶会川路。

会理州，下。州在会川府东南。唐时南诏属会川节度，地名昔陀。有蛮名阿坛绛，亦仲由蒙之遗种。其裔罗於则，得昔陀地居之，取祖名曰绛部，后强盛，尽有四州之地，号蒙歪。元宪宗八年，其孙亦芦内附，隶阡畔万户。至元四年，属落兰部。十三年，改隶会川路。十五年，置会理州，仍隶会川。二十七年，复属阡畔部。

麻龙州，下。麻龙者，城名也，地名棹罗能。乌蛮蒙次次之裔，祖居阡畔东川，后普恐迁苗卧龙，其孙阿麻内附。至元五年，为建蒂所并。十二年，属会川。十四年，立管民千户，隶会川路。十七年，立为州。二十七年，割属阡畔部。

柏兴府，昔摩沙夷所居。汉为定(筭)[祚]县，^[18]隶越雋郡。唐立昆明县。天宝末没于吐蕃。后复属南诏，改香城郡。元至元十年，其盐井摩沙酋罗罗将獐鹿、茹库内附。十四年，立盐井管民千户。十七年，改为闰盐州，以獐鹿部为普乐州，俱隶德平路。二十七年，并普乐、闰盐二州为闰盐县，立柏兴府，隶罗罗宣慰司。领县二：

闰盐，下。倚郭。夷名为贺头甸，以县境有盐井故名。金县。下。县在府北，夷名利窠揭勒。所居蛮因茹库，^[19]乃汉越雋郡北境，与吐蕃接。至元十五年，立为金州，后降为县，以县境斛焚和山出金，故名焉。

临安广西元江等处宣慰司兼管军万户府。

临安路，下。唐隶牂州，天宝末没于南诏。蒙氏立都督府二，其一曰通海郡，段氏改为秀山郡，阿蔑部蛮居之。元宪宗六年内附，以本部为万户。至元八年改为南路，十二年又改为临安路。领县二、千户一、州三。州领二县。宣慰司所领屯田六百双，本路有司所管三千四百双，囊蔑军千户所管一千一百五十双有奇。

县二

河西，下。县在杞麓湖之南，夷名其地曰休腊。昔庄蹻王其地。唐初于姚州之南置西宗州，领三县，河西其一也。天宝后没于蛮，为步雄部，后阿蔑蛮易渠夺而居之。元宪宗六年

内附。七年，即阿夔部立万户，休腊隶之。至元十三年，改为河西州，隶临安路。二十六年，降为县。蒙自。下。县界南邻交趾，西近建水州。县境有山名（自）（目）则，汉语讹为蒙自，^[20]上有故城。白夷所筑，即今县治，下临巴甸。南诏时以赵氏镇守，至段氏，阿夔蛮居之。宪宗六年内附，继叛，七年平之，立千户，隶阿夔万户。至元十三年，改阿夔万户为临安路，以本千户为县。

舍资千户。蒙自县之东，阿夔蛮所居地。昔名囊古，又曰部嫫踵甸。传至裔孙舍资，因以为名。内附后，隶蒙自千户。至元十三年，改蒙自为县，其地近交趾，遂以舍资为安南道防送军千户，隶临安路。

州三

建水州，下。在本路之南，近接交趾，为云南极边。治故建水城，唐元和间蒙氏所筑，古称步头，亦云巴甸。每秋夏溪水涨溢如海，夷谓海为惠，厠为大，故名惠厠，汉语曰建水，历赵、杨、李、段数姓，皆仍旧名，些麼徒蛮所居。内附后，立千户，隶阿夔万户。至元十三年，改建水州，隶临安路。

石平州，^[21]下。在路之西南，阿夔蛮据之，得石坪，聚为居邑，名曰石坪。至元七年，改邑为州，隶临安路。

宁州，下。在本路之东。唐置（黎）（梨）州，^[22]天宝末没于蛮。地号浪旷，夷语谓旱龙也。步雄部蛮些麼徒据之，后属囊蛮酋阿几，以浪旷割与宁酋豆圭。元宪宗四年，宁酋内附。至元十三年，改为宁州，隶临安路。旧领三县：通海，嵒峨，西沙。西沙在州东，宁部蛮世居之。其裔孙西沙筑城于此，因名西沙笼。宪宗四年，其酋普提内附，就居此城为万户。至元十三年，立为西沙县。二十六年，以隶宁州。至治二年，并入州。领二县：

通海，下。倚郭。元初立通海千户，隶善阐万户。至元十三年，改通海县，隶宁海府。

二十七年，府革，直隶临安路，今割隶宁州。嵒峨。下。县在河西县之西，控扼山谷，北接滇池，亦属滇国。昔嵒猓蛮居之，后阿夔酋逐嵒猓据其地。至其孙阿次内附，以其部立千户。至元十三年，改为州，领邛州、平甸二县。二十六年，降为县，并二县为乡，隶临安路。今割隶宁州。

广西路，下。东囊乌蛮弥鹿等部所居。唐为羁縻州，隶黔州都督府。后

师宗、弥勒二部浸盛，蒙氏、段氏莫能制。元宪宗七年，二部内附，隶落蒙万户。至元十二年，籍二部为军，立广西路。十八年，复为民。领州二。

师宗州，下。在路之东南。昔爨蛮逐獠、𪚩等居之，其后师宗据匿弄甸，故名师宗部。至元十二年，立为千户。十八年，复为民。二十七年，改为州。

弥勒州，下。在路南。昔些莫徒蛮之裔弥勒得郭甸、巴甸、部笼而居之，故名其部曰弥勒。至元十二年，为千户。十八年，复为民。二十七年，改为州。

元江路，下。古西南夷地。今元江在梁州之西南，又当在黑水之西南也。阿𪚩诸部蛮自昔据之。宪宗四年内附，七年复叛，率诸部筑城以拒命。至元十三年，遥立元江府以羁縻之。二十五年，命云南王讨平之，割罗槃、马笼、步日、思麼、罗丑、罗陀、步腾、步竭、台威、台阳、设栖、你陀十二部于威远，立元江路。

步日部。在本路之西。蒙氏立此甸，徙白蛮镇之，名步日睑。

马笼部。因马笼山立寨，在本路之北，所居蛮阿𪚩。元初立为千户，属宁州万户。至元十三年，改隶元江万户。二十五年，属元江路。

大理金齿等处宣慰司都元帅府。

大理路军民总管府，上。本汉牂牁县地。唐于昆明之桥栋州〔川〕置姚州都督府，^[23]治牂牁洱河蛮。后蒙舍诏皮罗阁逐河蛮取太和城，至阁罗凤号大蒙国。云南先有六诏，至是请于朝，求合为一，从之。蒙舍在其南，故称南诏。徙治太和城。至异牟寻又迁于喜郡史城，又徙居羊苴〔乖〕〔咩〕城，^[24]即今府治。改号大礼国。其后郑、赵、杨三氏互相篡夺，至石晋时，段思平更号大理国。元宪宗三年收附。六年，立上下二万户。至元七年，并二万户为大理路。有点苍山在大理城西，周广四百里，为云南形胜要害之地。城中有五花楼，唐大中十年，南诏王券丰佑所建。楼方五里，高百尺，上可容万人。世祖征大理时，驻兵楼前。至元三年，尝赐金重修焉。领司一、县一、府二、州五。府领一县，州领二县。